



Edwina Werleman:

Final di Caiso y final di Soca ta bay ta riba dos dia separa



Edwina Werleman, presidente di MUSICA durante e lanzamiento di e jingle di Carnaval pa 2020 Dialuna mainta a bisa cu e equipo di stichting Musica y di SMAC ta traha hunto pa hiba Carnaval na e nivel cu semper ta wordo desea. "Together we can make it better y Stichting Musica

na e momentonan aki ta den full preparacion pa Aruba Soca & Caiso Monarch 2020". "Mi kier a duna un pabien hopi grandi na nos artistanan, nos musiconan y bandanan cu a wordo poni hunto pa traha e jingle, pa trece e ritmo contagioso cu ta bay marca un biaha mas e historia

pa Carnaval 66". Esaki segun Werleman, kende a sigui bisa cu Stichting Musica ta wak cu hopi orguyo con cada aña e nivel musical ta subi. "Nos ta mira con cada aña e jongnan ta bin hunto cu e grandinan pa hisa e nivel di e cancionnan". Esaki segun e presidente

di e stichting, kende a indica cu Aruba Caiso & Soca Monarch ta bay ta di 27, 28 y 29 di Januari, esta e anochinan di pre final, mientras cu e final di Caiso ta bay ta riba 31 di Januari y e final di Soca ta bay ta riba prome di Februari. Galloway Jr. (Carl Roosberg Jr.), kende ta cantante

di e jingle a hiba palabra tambe durante e conferencia di prensa, despues cu Ruben Garcia a splica cu mirando e logronan di Galloway Jr na Aruba y internacionalmente, no tabata dificil pa escoge pa e canta e jingle. Galloway a tuma tempo pa gradici tur e musiconan y tur esnan cu a yude graba y produci e jingle pa Aruba su Carnaval.

E cantante a bisa cu ta un honor pa e por a haci esaki pa Aruba. Minister di Cultura Xiomara Ruiz Maduro y Minister di Husticia tambe tabata presente y e mandatario di Cultura ayuda corta e bolo cu e logo di Carnaval riba dje.

E minister a bisa cu e ta contento cu inicio di Carnaval, cu ta e actividad mas importante di Aruba, mirando sigur e aporte economico grandi cu e tin pa nos isla, Ruiz Maduro a gradici prensa, e reinanan, e participantenan di grupo, e bandanan y tur otro cu ta aporta na e tremendo celebracion di Carnaval.